

Supervizor Gregorian donio nalog kojim se omogućava privremeno finansiranje institucija Distrikta



Supervizor za Brčko dr Raffi Gregorian donio je danas Nalog supervizora o privremenom finansiranju institucija Distrikta za period od 1. januara do 31. marta 2009. godine.

Zakonom o budžetu Brčko Distrikta predviđena je mogućnost da Skupština obezbijedi privremeno finansiranje institucija Distrikta u slučaju da budžet za narednu fiskalnu godinu ne može da bude usvojen u rokovima koji su propisani u Statutu i Zakonu. Pošto Skupština Distrikta još uvijek nije počela sa radom u svom redovnom mandatu, zbog pregovora koji se trenutno odvijaju između političkih stranaka o budućoj vladajućoj koaliciji, Skupština nije u mogućnosti da prije kraja godine usvoji budžet ili odluku o privremenom finansiranju kako bi osigurala finansijske obaveze Distrikta.

Supervizor je, nakon konsultacija obavljenih sa predstavnicima izvršne i zakonodavne vlasti, stoga odlučio da putem nalog supervizora donese Odluku o privremenom finansiranju institucija Distrikta, kako bi osigurao da neizbježni izdaci mogu biti realizovani, zakonske obaveze ispunjene, a kontinuitet u funkcionisanju institucija Distrikta obezbijeđen.

“Odmah po izboru predsjednika Skupštine, zamjenika predsjednika Skupštine, gradonačelnika i skupštinskih komisija, Skupština Brčko Distrikta će zakazati redovne sjednice i započeti rasprave o nacrtu budžeta za fiskalnu 2009. godinu, koji dostavi Vlada Brčko Distrikta i usvojiće ga

najkasnije 30. marta 2009. godine", rekao je supervizor.